

Gregorian sutra u posjeti Srebrenici



Prvi zamjenik visokog predstavnika Raffi Gregorian sutra će posjetiti Srebrenicu, gdje će se sastati sa predstavnicima udruženja povratnika i predstavnicima opštinskih vlasti u ovom gradu. Ova posjeta je prilika da se razgovara o nizu mjera koje će pomoći da se stvori održiv proces povratka i bolji uslovi za život u ovom području.

“OHR pozdravlja obećanje koje su dale entitetske i kantonalne vlade kao i Parlament Bosne i Hercegovine da će osigurati veću pomoć Srebrenici. Međutim, veoma je važno da se ova pomoć potroši ciljano i transparentno, uzimajući u obzir želje lokalnog stanovništva u tom području,” rekao je prvi zamjenik visokog predstavnika.

“Koliko će se život povratnika poboljšati ne zavisi samo o povećanom finansiranju, već i o unapređenju saradnje između različitih nivoa vlasti kako bi osigurali bolje socijalne, penzione i zdravstvene usluge povratnicima”, dodao je prvi zamjenik visokog predstavnika. “Najbolji rezultati za građane i porodice žrtava mogu se ostvariti samo uz kvalitetniju implementaciju postojećih propisa te ako najviši organi vlasti u Bosni i Hercegovini podrže njihovo usklađivanje”.

“Vlasti u Bosni i Hercegovini, a posebno u Republici Srpskoj, moraju dodatno posvetiti pažnju stvaranju sigurnog okruženja u Srebrenici i detaljno istražiti navode o mogućoj umiješanosti policijskih službenika i drugih javnih zvaničnika u ratne zločine. Pored toga, potrebno je ubrzati proces traženja nestalih osoba i identifikacija,” rekao je Raffi Gregorian.

Ambasadori Upravnog odbora Vijeća za implementaciju mira su 23. marta zatražili od OHR-a da formira Grupu za procjenu

stanja u Srebrenici, u čijem sastavu su svi relevantni međunarodni faktori u Bosni i Hercegovini.

Ova grupa, kojom predsjedava viši zamjenik visokog predstavnika Peter Bas-Backer, ima zadatak da preispita međunarodnu pomoć uloženu u područje Srebrenice, te mjere koje su poduzeli domaći organi vlasti kako bi poboljšali uslove za život u i oko Srebrenice. Grupa se do sada sastala dva puta, uključujući jučerašnji sastanak.

Visoki predstavnik i specijalni predstavnik EU Christian Schwarz-Schilling u narednim danima će se sastati sa predstavnicima četiri udruženja žena Srebrenice i Podrinja, kako bi razgovarali o dodatnoj pomoći koja je obećana te njenoj namjeni.